

平谷縣志

貞

平谷縣志卷之四

藝文志

文類

傳曰太上立德其次立功其次立言此之謂三不朽然言
莫深於文而平邑凡有建立皆有文以紀其實今備載諸
志庶觀風者得有所考焉故志文


元

明倫堂記

至正七年三月

納憐不花撰

洵陽居士



皇元列聖相承詔令國都州縣設立學校張置師牧以行
政教開平萬世何其規模隆古軼越漢唐矣蓋以聖由天
縱道自人宏盛衰觀于風化忠孝本于人倫然後綱常正
義理明而民生遂亘古今而不易考之于經班班可見已
惟時守令師儒有賢有愚有志存乎立功事專乎報本祇
順德意惓惓于聖門者亦有志溺乎利祿事徇乎苟且徒
拘文具切切于肥家者由其闇于君親大義懵于聖賢至
教其于志道恢宏之士霄壤不侔矣况乎仕路繁夥存道

心者希或有德好君子功垂名教若亂山求玉乃千百之一二焉耳詳憫吾友李敬李明等重諗曰平谷乃薊郡之屬邑京師之僻徑亦當有要路居是任間報功于素王者如已巳年監察御史鄭立建加號碑設學田增輝聖日播種文風自丙子歲主簿范恕教諭張貴協謀合議以謂斯邑有廟像而無講舍基址狹隘如羽不翼于是出給俸資鳩集衆緡買地構材鼎新明倫堂洎學官居舍朝夕有三德六行之修歲時無一風半雨之憾至戊寅間有胡從先

來諭是縣仰瞻廟像祭器慊然俯親講席書籍蔑如于是
命匠鎔鑄鐘鼎營飭籩豆九經史籍煥然一新上供春秋
釋奠下給師生講習焉此數君子創作于前可謂能矣迨
甲申際劉元皓師職三年建學門屏以爲斯文之壯觀增
廣田畝以備供需立故金國張侯建廟記以表首創之原
繼述于後可謂勤矣自是而後肅恭寅畏神人協和師生
有舍庖廩有給百爾器具資之左右愚故曰有志存乎立
功事專乎報本今得其人耶經曰故事半古之人功必倍

之惟此時爲然蓋將有興于斯故仰聞是言而不惑于中
悲夫愚故曰亦有志溺乎利祿事徇乎苟且未暇論其人
耶驗吾友之言爲信嗚呼吾夫子之道如太和元氣流行
于天地間陶鎔品彙綱紀羣生儀範百王師表萬世其盛
德大業至矣哉凡有天下國家者不可不知所本乎吁微元
皓不能明數君子之功微數君子不能伸元皓之志可謂
克盡其行所當爲矣予故欣然筆之以紀堅珉匪特叙二
三子之功抑亦可爲來今之勸時至正七年丁亥三月丁

巳日也

明

新城記

成化戊子年二月

淳安商

輅 兵部尙書

平谷縣在薊州治西北八十里古之漁陽地今爲順天府
屬邑西連密雲古北口東接山海道經遼東北臨極邊諸
大山永樂初置營州中屯衛以鎮之今黃松峪等四關熊
兒峪等四營官軍守備者常數千人蓋重鎮也縣故有土
城歲久傾圮今右僉都御史閻本奉令巡撫至而嘆曰城

郭所以衛民况平谷密邇京師爲東北屏蔽兵民于是乎聚儲糧于是乎積非有高城深池將何恃以爲重乎于是謀諸總兵官東寧伯焦壽左參將都指揮劉輔皆曰都憲言是也疏請於朝得允爰委營州右屯衛指揮同知袁忠等督軍夫若干增築之城高二丈五尺址廣三丈五尺頂殺址三之二周圍六百丈爲城門四門有甕城甕城又各置門城之外爲塹闊三丈五尺深半之沿塹植榆柳幾萬株經始于成化丁亥訖工于明年二月功之成視舊加四

之三于是居室晏然雖外戶可以無閉防禦之計遠矣僉
謂是城也邑小而役鉅不可無文以示來者而縣丞宣謙
遂述增築始末來徵予記予惟重門擊柝以待暴客易之
有取于豫者素定意也天下事未有不成于素定而况保
障爲爲政之首可使之因循廢弛于晏安無事之時乎惟
茲城郭旣新人心始安可以奠民居可以廣儲積可以繕
甲兵養威蓄銳復何外侮之足慮哉書曰惟事事乃其有
備有備無患此之謂也若都憲公可謂防患于未然者矣

乃若力出于閑暇之時而費出于規畫之餘于衆無擾于
事有功此善之善者也後之人能嗣而葺之其利閎且遠
哉因爲之記

白雲寺記

弘治十二年菊月望日

邑人金

純山西布政使

白雲寺距平谷縣迤東北約二十里有山曰峨嵋其脊以
東又十里爲黑豆谷峯巒環匝草木暢繁實古幽棲之所
胡元一統邊幅不塵大德初有僧名繼廣者集石爲垣採
山棟而始構焉元末蕩爲灰燼入我皇明六十餘年無有

因舊而興之者正統乙丑春濟南繼廣禪師北遊諸刹卓錫于斯仰觀山形俯察地脉有泉有田遂有由然而不忍去之意乃嘆曰地僻山幽道在此矣盍結廬以休居無何戒律之嚴聞于遠近居人懷其德賓旅識其誠僉謂曰興廢舉墜吾師事也師居此而法像不修是不足以弘慈教盍謀所以爲之已乎師曰吾意也遂募於檀那而勤於已力閱而如來殿成苟美苟完百廢粗作迨景泰甲戌秋欽差御馬監左監丞黃帽以上命之邊偶經于寺一接廣師

參乘竟日扣其中含弘定止無量無邊卽相與握手曰吾師居此得無隘且陋乎乃出錢若干萬緡增其三世殿爲三間創左之堂爲伽藍右之堂爲祖師承堂而構爲居僧之所簷鐘有樓鳴鼓有枹黝堊丹漆舉以法入其門大殿翬飛金碧相照儼然一大祝釐地也黃公不以爲德廣師不以爲功垂四十年卒無發心紀其事者今年師且歿其徒名漙禮者乃曰吾師歿矣而其功不紀則歲遠必湮遂徵予文以紀之予爲佛西方聖人也生刹利王家放大智

光明照十方世界至漢明帝夢金人飛至殿庭始入中國
歷晉宋齊梁魏隋之間其教寢盛世之供奉者丹砂黃金
文珉香木窮極侈麗葩華絢飭然後爲快苟有疑而闢之
者乃外道魔障佛之罪人集千有年于茲矣予嘗考究其
說大率以念物爲宗以觀心爲法以惠逆凶吉爲因緣欲
俾蠢動含靈同登正覺其利人也亦週且溥矣傳曰欲生
惡死利害私情況恐之以果報輪迴之說有不崇而信之
者乎是宜法之繁昌而說之得行也矧其間傳燈若廣師

輩者又從而闢荆棘畚瓦礫鼓舞而振作之耶是故不可
泯也雖然廣師此舉上祝皇齡下祈民佑功德大矣然有
作幻也有相亦幻也其如成壞之數何哉予曰有形有幻
理固宜然惟能卽幻法而證實相則天地一廈萬象一身
也若是則雖歷塵劫妙運無涯尙何成壞之足云乎後之
繼已完之業享不爲之功有房櫺以自安無規級以相持
舉前人勞苦之所辦者適以便私曾市肆賈區之不若由
之而致壞者必斯人也可不切監而痛革呼若漙禮者不

忘師功而勒之堅石固此之反而不羣者予因之而有所
感矣殿始於景泰乙亥之三月而落成於明年丙子五月
若工興費經營常事也則不必書

東嶽行祠記

正德元年三月二十八日

邑人金純

平谷縣治西一里有東嶽行祠祠石鼎所載重修于勝國
至元三年不知創自何許時我太祖高皇帝混一中原重
天地百神之祀凡前代所建廟宇祠觀有益于民者聽民
崇祀故邑有嶽祠或歲時水旱癘疫咸祈禱之神亦肆其

威靈屢祈屢應每春夏之會俗傳爲天齊聖誕四鄉之人
爭持牲醴享賽于庭復爲迎神之舉歷世相沿率爲故事
永樂初東軍寇亂祠燬于兵存者無幾正統甲子河東張
君鐸來丞于茲首倡士民復興舊址門堂殿廡百爾粗作
迨成化甲午營州中屯衛舍人景鐸乃謀于衆曰嶽祠爲
吾邑具瞻錫祐深渥張丞雖已圖復而狹隘苟完不足以
棲神衆吾徒安居暇食惟神之庇盍謀所以新大之可乎
于是遐邇翕助若干萬緡召匠命工扛材輿石雖三尺童

子願輸其勞鳩僦至落成凡十閱月增中之殿爲三間以居天齊殿之左翼一間以居炳靈右翼一間以居府君東之堂三間則爲三義廟西之堂三間則爲聖母殿虛鐘鳴鼓有樓有枹繚以垣墻蔽以三門翬飛跂翼丹碧交輝工雖十倍于前啓之者實二尹之功承之者則舍人之力也祠成景君出資具石將誌其顛末以傳未幾厭世事竟寢息垂三十年景之孫有名源者撫其故石惻然以痛曰吾祖之虔奉于神久矣今祠成而厥功弗紀數傳之後不幾

于泯泯矣乎卽出已金募人緣命工礪石以畢先志徵予
爲記予惟五嶽在天地間依形而立乘氣而行嶽爲衆山
之宗岱又諸嶽之宗也考之祀典天子祭天下名山諸侯
祭境內山川東嶽泰山之有祠宜矣而古今祠祭禮各不
同嶽者地祇也祭之壇壝而不屋其牲幣祝號則視三公
舜之望于山川是已後世此義不傳自拓拔氏始總立一
廟于桑乾水之陰逮唐復各立一廟于五嶽之麓以及趙
宋之衰而東嶽行祠徧天下矣旣廟之又王之旣王之又

像之地祇而肖像若人焉至於今莫之或改也我聖祖削
平僭僞考古創今一洗前朝之陋而加以泰山之封其示
萬世法程至明也凡所在城邑猶往往祠之者何歟按公
羊傳云泰山之雲膚寸雨合不崇朝而徧天下其潤物之
功如此則天下所以尊崇而報祀之者非過也宜也况祭
法有曰能禦大災則祀之能捍大患則祀之今百靈森布
轉異爲祥寧不重可祀也是祠成下以禳災消變爲民禱
福上以祈天永命爲國祝釐此固張丞之志景舍之心也

若源者亦可謂聿修厥德肯構肯堂者矣是不可以嘉尙之哉庸書此以誌其梗概

重修慈福寺記

正德四年重陽日

邑人金純

御馬監太監劉公僧嘗逮事我英宗皇帝忠勤謹慎爲上所知在中貴間特深眷注公每退食輒私念曰某本山林樗賤遭際聖明晨夜以興無由展報意平谷爲京畿屬邑而山東卽其近郊宅幽勢阻地勝泉甘擬造寺一區以爲祝延之所犬馬之心庶幾少盡籌諮旣久于是出金若干

萬緡掄材輿石鳩匠聚工相隰度原取其地之面陽者構
如來大殿列左右爲迦藍祖師大殿之南爲天王又其南
爲山門周以垣墉樹以嘉木由側門直北則爲方丈爲僧
房爲溜浴庖廚之舍爲楹凡六十有奇經始于正統甲子
之春以是年秋仲考成爲日凡百八十基臺崇拓棟宇翬
宏丹碧文珉各呈工巧未幾繪圖以進公遂奏請于朝賜
名慈福命下之日緇流耆艾咸豫悅奔走樂來贊相若公
者真可謂問水知源克酬心願者矣始公披地按圖意猶

未嫌將欲更營法藏護國轉輪諸殿值北鄙多事扈駕親
征致身王事齎志竟終據今甲子再週閱年寢久寺漸就
荒營州中屯衛官舍景祺居士楊友想其風致憫夫初志
之純誠也乃卽其所營之緒繕修粧飭以識不忘且礎石
以載其顛末徵予爲記予惟忠義之在人心不異時而有
先後之殊不同時而有彼此之異劉公所舉本以上報鴻
恩假蓮界以爲之地延今五紀寺幾中絕復得祺友二君
以興予意二君亦非作念天堂力超諸苦果若浮屠說也

只以忠義之心激之有不得不然耳嗚呼事有曠百世而相感者其獨人心矣夫至若醜虜跳梁公能奮不顧身卒以保完名節其英風勁氣凜然與東盤大嶺爭高又其事之可書者也因爲之記

龍泉寺記

正德五年仲春立

邑人金純

盤龍爲東畿大山蜿蜒以西又十里爲暗峪峯巒峭刻氣勢連霄爲平谷治東之界峪間夾兩涯有泉如練自東北折每春夏雲英英騰上頃刻覆山谷其色正白若大海茫

無際涯人因曰龍泉泉之北巉崖壁立空翠撲人左右
諸峯皆相顧拱揖黃精赤茯苓雜植其間境異山幽雖當烈
火流金使人條條有挾纒意元至正僧人順公結庵于處
庵以泉名以誌山川之勝元社不屋基址就荒入我朝百
有餘年日漸榛莽成化己丑營州中屯衛舍人景鐸因別
墅去庵不遠每肩輿而至輒臨流坐石景與心忘既乃嘆
曰地勝之興將有俟于人乎乃出金市地偕僧可懿協力
興復時諸色草創香火僅存迨四門塔僧悟興號太雲者

極力苦心漏求檀越得金若干萬緡米若干百石始庀工
敦匠建如來大殿于中左爲迦藍右爲祖師又其東爲居
僧之所簾鐘枹鼓以樓以亭涵浴堂厨各有次舍雄深瑰
麗金碧交輝偉然一大叢林直與盤龍諸刹相高非昔之
庵院比也興之徒曰本寬本源源之徒曰眞讓又能承師
之志作大士殿于主山之眉建浮屠于案山之表當四時
雲物變幻而樓塔出沒于烟霏空翠間潭影光天徘徊上
下山川之麗一旦改觀遠近來遊莫不喑喑稱賞寺成于

正德庚午溯其經始幾四十餘年衍之者非一僧成之者非一日可謂大且艱矣據今鐸與羣師俱先後淪沒鐸之子曰祚讓之徒曰常善恐其功遂泯泯無聞徵予爲記予惟山川之勝必得其人而後可鳴當龍泉兵燹之餘巒光水色頗失故態栖栖于林薄榛莽間殆與凡流衆垓等耳今緇流一鼓而幻成寶坊暮鼓晨鐘酬恩駐貴則山川秀麗與有光輝孰其使之然耶昔五峯非自鳴也以普庵鳴湘山非自鳴也以無量鳴他日龍泉爲東盤第一山者又

安知其不以悟興鳴也因爲之記

科貢題名記

吉豐陳

烜 本學訓導

取士之法其來尙矣成周有鄉舉里選之制漢則有賢良方正茂材明經等科目唐則有進士秀才明經明法明算明書等科第惟我朝列祖相承酌古準今而以科貢爲取士之法誠曠古之良規也士生斯世何其幸歟夫科貢之設名殊而實一者也游庠序之士以五經四書而端其本領以策論詔誥而廣其經濟科之所錄者此也貢之所升

者亦此也初何嘗以古之殊而異今日之所習亦未嘗以途之異而岐他日之所施故漢之董仲舒公孫宏以賢良舉者唐之陸贄韓愈以進士舉者而董仲舒天人三策與陸宣公之奏議百篇同一機公孫宏之表章六經與韓退之之左右六經同一道豈山若樵之河若漁之名殊而實異哉且題名有碑所以紀名氏謹歲月示榮觀垂永久也與是列者名固榮矣然名者實之賓實者名之主使名著而實不副則亦何足以爲榮哉孟子曰誦其詩讀其書不

知其人可乎是以論其世也觀人者其取以爲法焉士登
名于茲者必進而友天下之士又進而上春官對大廷而
展其底蘊以幼之所學而壯行之在廊廟則寅亮天工在
臺諫則責難陳善在岳牧則承流宣化樹功業于當時垂
勳名于後世俾人之觀斯名也稱其人論其世也美其功
如漢唐諸君子之照耀簡冊膾炙人口則實有可稱而名
之榮也非溢美矣又何擇于科貢哉先儒有曰所入之途
雖異所至之域則同信斯言也于是乎記

重修城池記

邑人王

鏗河南副使

平谷縣治舊無城永樂二年營州中屯衛自塞北徙之腹
內安置平谷縣中城始建焉是時草創土築未遑以磚石
包砌歲久城崩圯便道者越堞通行若履通衢然成化丁
亥大中丞閻公本撫臨茲邑仰而嘆曰所賴以保障吾民
者城焉耳崩圯如此將何所恃哉爰是命官計財包砌磚
石四壁如削壁各設門以便防守且以漸次置修樓舖以
爲瞭望計方經畫之際而轉官之命下矣功不竟就迄今

六十餘年嘉靖壬午歲郊圻盜發掩其不備長驅入市剽掠任情居人內外恐怖未安巡撫孟公春兵備熊公相憂之于是協謀設策勦平厥盜地方僅得無恐迺命掌篆指揮季君勳經略保障董工修築缺者補之廢者葺之建樓于諸門之上重簷華棟規制一新東曰接盤南曰觀瀾西曰迎恩北曰鎮遠腰舖隅樓次第結構凡觀之者咸以爲奇峻之功也鎮撫王傑來請于予曰董大事者未始不勞費也季君承委克殫厥心材物廢諸浮屠工力用之閑暇

帑藏不減軍務不妨人不告勞功倏就緒其事偉矣敢乞
其文以紀顛末予嘉其績遂書此以應之夫土木之功難
成而易敗也廉靜者遠嫌棘欲者斂怨貪求者上疑昏柔
者下慢遠嫌則爲己也斂怨則失人也上疑則起咎也下
慢則弛事也是皆承委者之通弊也季君承委剗此四弊
掩百年因循之咎成一時保障之功其賢能過人遠矣監
司憲臣後先獎勞是亦嘉其能爲者歟雖然城池高深固
足保障矣借使撫馭乖方人心怨惡雖有粟穀兵甲誰與

爲守哉是知守國之道人和爲先地利次之故孟子曰地利不如人和吳起曰在德不在險凡有國家之責者庸可不知輕重緩急也哉季君有功德善撫馭政事固無容喙矣第恐將來繼之者不知設險守國之義予因丁寧以告云是爲記

重修東嶽行祠記

邑人金

濂山東運使

粵我朝正大統之三年詔嶽鎮海瀆封號如古制以山水稱凡近世所褒嘉者一切罷去所以揆前聖大中之道而

隆一代尊崇之盛典也平谷縣舊有東嶽行祠在縣治西
幾一里不知創于何時俗傳爲遼金有國卽有此祠理或
然也迨國朝漸加修葺已備于方伯先君所撰之碑據張
丞重建以迄于今垂六十稔閱年旣久土木就隳正德改
元歲太原高君來知縣事越明年夏禱雨于中牲醴旣陳
俄頃之間甘霖如澍高已駭其爲靈一旦政務之暇諭于
衆曰泰山爲諸嶽之宗百神之長仁符震動德體離爲顧
廟貌不修豈吾人所以瞻奉者乎盍共圖之以資冥惠衆

曰唯唯卽出資市木諏日聚工植朴扶傾易堅去腐工勤
材善百廢俱新正殿而外復增一楹以爲軒宇整砌塗茨
舉以法文金秀碧彩繪爛然不侈于前不浮于度是役也
其費匪直千緡公不知勞私不知困經始于是年七月落
成于次年三月蓋始終興率者高尹之勤其合作助成則
衆民之力也嗚呼神之動人有如是哉且高之爲縣不立
異近名一以誠心感激如修學校新壇壝建橋梁三載之
間翕然向緒而此則君之一善耳祠成屬予以記予惟天

下之事是非邪正皆可暫欺惟人心不容厚誣今高君一以義舉而民卽義從以心感心盖有不期然而然者矣又况引之以民生日用之彝諷之以忠君孝親之大而民有不不應徯志者乎書曰罔迪不適周公曰平易近民民必歸之此之謂也祠旣新祝釐有日爲居民者歆神之福又當思作起者之功則祠之方興固未艾也高君名賢世爲山西臨縣人其功德主則義官張宣耆老巨紳其最者也因爲之記

岳侯遺愛碑記

嘉靖二十年仲秋

邑人金 濂

嘉靖庚子春清湘蔣公以方伯入爲京兆適審編徭役之
期先時各該州縣地畝人丁儘派本州縣原額之差足穀
爲止行之既久法玩弊生殷庶之地反獲其輕窮約之鄉
或撓其重官盲吏瞽莫究所由公廉得其情乃藉一府四
州二十三縣地之廣狹丁之多寡田之豐瘠與夫歲徵之
緩急輕重通融而均一之務使合併爲公民無偏累章上
而命下司徒議覆以行時撫按重臣俱仰承德意飭戒所

司協京兆委官竭力秉公求無負皇上軫念斯民之舉檄至而平谷岳侯適當選任乃捧檄加額曰吾志也吾民其尙寧幹止已乎遂撫不便于民者數事乞援當道以蘇民困一查舊管以豁開除本縣原額地一千七十八頃五十畝節因里墜民消拋荒近半宣德年間撥去興營二衛屯種開除地三百二十九頃三十一畝就彼納糧冊籍可查本縣見在地七百四十九頃寄養官馬七百四十九匹俱係欽差科道照畝審編別無餘空後因巡撫都御史洪

奏添地銀不辨舊管開除照額仍派銀一千七十八兩五錢一分以致終歲包賫膏脂匱竭一審權宜以祛民患永樂年間太監三寶差往西洋偶因舡隻數多暫于附近地方借倩人夫拽送比時順義平谷二縣各出夫六十名實一時權宜之計順義已先革除惟本縣至今歲出銀一百兩號爲通州協濟夫錢事出無名誠爲冒濫一遵成憲以息新科本縣原額漁戶一十三名每年該納課鈔一百一十七貫遇閏加鈔六貫七百五十文正德年間忽遇欽差

內官前來採打銀魚無故勾拏漁戶陡添椿木葫蘆羊皮等料銀二十餘兩遂爲常規一或稽遲官吏輒如凌轢近年以來又坐武清灤縣水占地畝原編楊村遞運所水夫銀一十三兩宛大二縣車輛銀二十四兩委的地窄民貧不堪賸負若不預爲申請誠恐通融之後控訴無門于是當道悉侯之賢憐民之瘼覈審至三乃于不平之間均攤公抑帖下計派應存力差三十五頃共銀七百六十兩八錢應存銀差三十七頃共銀七百五兩二錢二忽五毫應

減銀力二差銀共八百六十一兩一分五厘自後審編永
爲定式侯之心始慰而民之怨始消是雖出於皇上溥天
地生育之恩以立斯民之命其割裁補濟將順奉行實一
二臣工嚮卽有僚之績也而吾邑岳侯亦可驗其心在乎
民卒能脫民于積年偏累之中而並置之玉燭春臺之內
卽傳所謂民之所好好之民之所惡惡之此之謂民之父
母是已後之續良吏者當與魯卓先後相高又不但虎北
渡河蝗不入境銷患于一時而已也耆老因不敢諉侯之

功囑予爲記勒之堅石永矢不忘予曰侯之遺愛非止一端而民咸不識不知此特鳴其顯著者耳侯名朝用別號嶧山山東鄒縣人前以薊州節判擢爲今職云

重修城隍廟記

嘉靖三十年五月

邑人金 濂

皇明有天下建邦設都自京師達之郡邑雖遐陬僻壤莫不創城隍廟以闡幽靈故仕是邦者上任必請于斯朔望必禮于斯春秋祭享必告于斯水旱疾疫必禱于斯官秉其忱神應如嚮自古以來人心宗向罔敢弗欽廟舊在縣

治北洪武初拓地面陽構正殿三楹以安神主繚以垣墻
門以三座擇道祝以司香燭迨成化己丑歲久漸頽鄉耆
王眞等合衆繕修舊規咸葺嘉靖辛丑元夕張燈忽遭回
祿之變邑大夫嶧山岳朝用倉卒失措援救莫能達旦咨
嗟乃召城之父老素稱公正者二三人諭以助工恢復以
妥神棲于是營州中屯衛舍人王沐鄉耆周正等共矢發
心願襄盛舉除侯捐俸及設法處分以供先事外各耆樂
出己貲及四鄉著姓不募而來施者雲集霧滂得鈔若干

萬緡遂易材於市礮石於山鳩匠聚夫先營大殿三間爰
及外門高廣各增前之三尺上瓦下璧朽鏤四周殿中塑
聖像一龕旁分侍後文璿香木金碧交輝可仰可瞻改觀
疇昔經始于是年三月落成于次年八月向非侯之政平
民信一鼓而蕭然瓦礫幻成錦坊曷克以臻是哉是亦可
以觀政體矣工完沐等勒石以傳乞予爲記予惟天下有
不窮之變而吾心有不易之理誠得其理則變之不窮者
皆理之不易也理之所在不外乎人以不易之理而禦不

窮之變焉則規締宏深咨詢周密孰有出于範圍之外矣
乎廟貌之新固其所也雖然崇墉重隍所以爲民也高堂
遠簾所以辨等也一舉而兼盡焉侯之賢又足徵矣謹誌

重修縣後堂記

嘉靖丙辰年

邑人金 濂

平谷縣去都城百四十里祖良山來龍以開疆土當有虞
揖位以冀青地廣始分冀東等處爲幽州卽古漁陽上谷
之地自我國朝定鼎燕京遂進爲畿輔上游之地材官甲
士駕出他方上嘗以規式詔于土中大小公居周爰執事

靡不畢備分署以聽各司其所遵行百餘年堂簾弗易而
民志定焉詩云風雨攸除鳥鼠攸去君子攸芋又云于時
處處于時廬旅于時言言于時語語此之謂也頃者醜虜
跳梁閭閻弗靖朝廷委一二重臣便宜勦絕雖屢獲奇功
而除惡務本猶未盡寧嘉靖乙卯春馮公來尹是邑立心
高古值時勢方殷達觀治所嘆曰高城濬隍練兵防守此
其時也將孰貽之遂日夜繕修城郭操演民兵三月之間
人心感激又以官居弗盛無以壯我軍威之盛首新憲府

以爲觀瞻繼理縣司以安羣衆縣中爲正堂右爲幕廳並南向東西列房科各四楹前爲戒石亭又前爲儀門者三門外東爲土地祠及預備倉西爲罪人獄又合爲大門者三門外列榜房東西各一間此皆前官已修而尙新者也正堂之後爲後堂後堂之東爲書房三間以爲齋宿之所正宅原在東偏宅舍俱新今始移入後堂之後以爲知縣住宅縣倉之後二門之內照前原立公廨六間爲縣丞住宅幕廳西公廨六間爲典史住宅六房吏舍各樹于東鑾

靡不畢備分署以聽各司其所遵行百餘年堂簾弗易而
民志定焉詩云風雨攸除鳥鼠攸去君子攸芋又云于時
處處于時廬旅于時言言于時語語此之謂也頃者醜虜
跳梁閭閻弗靖朝廷委一二重臣便宜勦絕雖屢獲奇功
而除惡務本猶未盡寧嘉靖乙卯春馮公來尹是邑立心
高古值時勢方殷達觀治所嘆曰高城濬隍練兵防守此
其時也將孰貽之遂日夜繕修城郭操演民兵三月之間
人心感激又以官居弗盛無以壯我軍威之盛首新憲府

以爲觀瞻繼理縣司以安羣衆縣中爲正堂右爲幕廳並
南向東西列房科各四楹前爲戒石亭又前爲儀門者三
門外東爲土地祠及預備倉西爲罪人獄又合爲大門者
三門外列榜房東西各一間此皆前官已修而尙新者也
正堂之後爲後堂後堂之東爲書房三間以爲齋宿之所
正宅原在東偏宅舍俱新今始移入後堂之後以爲知縣
住宅縣倉之後二門之內照前原立公廨六間爲縣丞住
宅幕廳西公廨六間爲典史住宅六房吏舍各樹于東

鑾

駕有亭縣庫有樓悉安善地縣治之界周築夾墻以便巡更之路大抵皆仍其舊磚瓦木石多需素積分毫不取于民經始于是年八月落成于次年五月美輪美奐規制一新僉以爲當誌于石以示將來因囑予言予惟周公之治東郊師保萬民民懷其德武公之治衛源盛德至善民不能忘此天理之常存而人心之不泯也今侯蒞任期年而竭忠報國公爾忘私則將來之豐功偉績足以繪凌烟而紀太常者不有光于二公之後也哉後之視今猶今之視

昔有必然也若縣僚二尹林公萃縣幕胡公鳳亦皆贊襄
于朝夕于法皆得書侯名思忠山東高苑縣人孝川其別
號云

重修本縣儒學記

嘉靖甲申年四月

台峯熊

相兵備副使

平谷縣之儒學在縣之離位勝代以前爲老子宮今之門
尚因之淺狹卑陋加之垣墉棟宇率多傾廢見者病焉嘉
靖壬午監察御史熊公榮以清戎按縣遵制視學嘆曰有
司之不職一至於此何足以稱國家育才興化之意偶過

邑人按察副使王公鏜及之鏜曰鏜爲諸生時固嘗買地拓之矣矧有觀風之責者乎公乃命官度之計費凡若干倡以贖金聞者響應巡撫都御史孟公春巡按御史盧公瓊總兵都督馬公永參將呂君昌咸有攸助以相之不穀亦與焉旣而兩載弗績公自往督之先後聖殿次展賢廡次建戟門存易櫺星次立禮門次闢義路次拓明倫堂次實地之偏陷者繚之以周垣表之以欂楔復以餘材建號十五間以便講習省課有方成之不日輪奐奪目士林爭

氣于是教官率生徒詣相述知縣王謙之言曰學雖隸縣而博士弟子軍衛居半焉彼此坐視忽成淪廢不圖今日有勞諸公敢乞一言以釋其愧且以詔後人于無窮予曰崇儒重道國家盛典祇奉于有司者已不多見况憲臺乎哉宜諸君子此有不能自己者夫天下之藝有文有武而學必曰儒者何耶蓋以文而非儒則爲俗吏武而非儒則爲槍夫俗吏槍夫可以興治戡亂之事望之乎哉故人無擇于軍民必以儒學爲先官無分于彼此必以興學爲重

國家之長治久安比隆三代者未有不本諸此謙輩曾知之悉乎且儒者之道不越乎彝倫日用之間推而極之無所不有若上而爲教下而爲學亦道之所當然也公之是舉誠無所負矣至于徒擁皋比不能明是道以覺後人徒文章甫不能體是道以光國家而徒獲一科第則施施然足矣是果誰之責哉其愧又有甚於有司者尙相與勉之公字以仁號磨溪汝寧光山人起家進士嘗以直言謫官今清戎圻內風力尤擅一時而政之可久皆視之茲學云

重修平谷縣學記

嘉靖四十二年八月

上海秦嘉楫

巡按御史

考圖籍平谷嘗縣于漢鎮于唐復縣于金元國朝因之古稱慷慨悲歌之區信矣元至元乃立縣學然未知其所以教者果能滌蕩其舊習而率由中國仁讓之風未也自我太祖高皇帝混一區宇臨御天下三十有五載漸磨德義鮮不丕變至我文皇嗣位以幽薊形勢雄偉允哉天府之國遂相與重臣定鼎而遷都焉故平谷遂爲畿服內地首被聖化愈近而愈深其士子服從學官之教不猶江河之

就下愈順而愈速也由是博士弟子奮起而登仕版者蔚爲名卿可概見矣然廟學歷歲滋久隳圯日甚良有司敦治崇教者雖間有補葺亦以費繁務劇爲懼率皆苟簡可歎哉嘉靖辛酉夏平谷縣知縣任子彬卜日舍奠于廟觀其庠陋毀隊惕然改容曰縣之廟屋壞神不能妥其誰責乃與學官張汝言諸生方文光數曹謀咸曰茲誠有司首務也如財不贏何又轉而謀諸鄉士大夫鄉士大夫其謀同又轉而謀諸耆庶耆庶之謀亦同于是舉邑向風慕義

視茲役若不可已者官之吏于斯者捐其祿大夫士之產
于斯者捐其貲耆庶之供億于上者捐其力凡材木陶甓
黝堊丹漆之需畢具工師圻者擾人顧儼之屬咸集諏曰
舉事或新或作余適奉璽書蒞平谷詣學謁廟不俟關白
而知任子之所尙矣乃移文所治出其帑所贏以助傭費
不期月而告成任子舉其緒而請曰爰卽舊址建先師廟
兩廡崇廣皆倍昔外有戟門有櫺星門有啓聖祠有敬一
亭有文昌祠有鄉賢名宦祠有校官舍三區殿後建明倫

堂堂左右翼以神厨庫有崇德廣業二齋戟門前鑿泮池
登三石梁其外橫衢豎二坊東曰興賢西曰育才又于學
宮旁地闢爲會講堂左右設宰牲齋宿二所計凡若干楹
所需之費凡若干緡所役之工凡若干人經始于壬戌冬
十月落成于癸亥六月敢乞先生大人一言以爲記余欲
以不能鑄辭爲解非任子重學校意亦非余廉察有司職
也嗚呼孔子之功德被于萬世與天地日月等聖自堯舜
而下俱莫能望豈區區崇廟宇修俎豆所能報哉顧業儒

者不敢忘其本耳余爲諸生時嘗見爲長吏者一意于錢
穀獄訟典幹審畫希聲采譽以求調補視學校之事爲非
簿書勦會之所急而抹撒漫漶者比比每深陋之今任子
爲平谷而以不任學校事爲懼首興是役完舊益新立有
成績鬱然畿甸之偉觀俾平谷之子弟益興于學化鄒魯
于幽薊更弦誦于悲歌其功豈不偉哉任子業儒而知本
者矣余亦業儒者遂因其請而爲記凡與是役者皆得書
名于石

平谷縣修城記

嘉靖四十四年四月

蒲坂張四維

翰林院編修

平谷古漁陽地爲邊防重鎮城郭溝池所以爲防禦計者自昔視內地爲急然今圻邑也又介在四山中峰警視諸邊差少是以守土者易焉而備禦益疎縣舊有城池歲久夷陲攀堞往來不異周道今尹任君彬旣視事思以興葺之顧歲祲財詘未足役也癸亥冬寇馬奄至城下任君部率市民分地設方略以守之晝夜巡警無所不至陴內始免于危事平之後任君乃札延邑之名德巨室閭長黨正

諭將有事城池爲扞圉永策衆驩然稱便遂上其事監司
監司咸是之撫臺雲中溫公令守軍採薪燒灰以濟其役
按院洛陽董公檄贖鍰百金以佐其費其諸當道若總督
軍門劉公屯院秦公關院陳公密雲兵備道張公悉有金
穀助焉任君迺自理百餘金爲士民倡邑衆開磚窑百二
十所以陶于是諏日戒工富效財貧出力吏彈勤工獻巧
城以丈計凡周六百五十撤而修之者過半城舊高二丈
二尺增築五尺俾益崇又于城四門各樹以樓扁其東曰

挹盤西曰拱辰南曰迎洵北曰威遠城隅增舖舍四又濬
其隍丈餘沿塹悉植以柳當四門之衝置便橋焉經始于
甲子閏二月廿日竣于是歲六月之望凡五閱月而工成
城峻而堅池深而闊屹然改觀民有固志矣任君迺述事
始末問記于余余惟備禦不虞政之善經故城郭溝池之
固雖襲承平之時然猶不可一日無戒心焉而矧多事耶
顧列城十百傾夷者半冠至常苦無備何哉則用民之難
耳蓋患貴于防微而民難于慮始未覩其害而先勤之則

勞且怨雖告之以必然不信也平谷城池之建在先無所
考而唯見于成化丁亥巡撫閻公之疏請其所述規模建
置在當時稱雄厚矣後五十餘年當嘉靖壬午而始重修
之以礦徒之變城已不能支矣迨今又四十餘年因寇警
乃復修而加壯焉蓋民有所創則其趨事也易興大役動
大衆不得不因乎民耳任君蒞平谷幾六年扶敝拯羸煦
煦然如慈母之于子而且爲之防患深遠其所以舉羸于
力詘獲遂有成事者唯民之因加以賢監司提持而佑濟

之者弘也昔成化丁亥城之始建也寔惟巡撫閻公嘉靖
壬午則巡撫孟公重修之今茲之舉又唯溫公是賴此三
公者域民翰國先事謹備其雄略著在疆圉者前後較若
畫一也而茲其一節云

平谷縣題名記序

隆慶六年二月

關中劉

愛

平谷縣尹

國朝海宇清熙文武昭宣凡登仕籍者罔不以靖共勉厥
位而所寓咸題名以識歲庚午不穀以三河倅叨長是邑
視篆之日登城埤覽山川眺關塞見山巒翠嶺環然四塞

地狹而平一望徹畢方不百里口僅千餘視諸隣封才一里之氓耳余獨怪昔稱富庶而今若此不知昔人何以施爲將欲自考卽詢其故於紳士僉曰昔也地一千二百頃撥給軍屯者五百頃矣昔也戶九千五百九十口兩經大虜蹂踐死亡過半矣里甲照地而應差錢糧照地而增派浮費冗役與諸郡同加而莫之恤額設議處與諸郡同視而莫之減矧自總督開府于密雲易偏僻爲衝要編里甲爲驛遞三孱之民蕭條之邑有加而無已如之何而不窮

且困也哉不穀履任且年餘矣固不敢以窮且困自諉而景仰前賢每思砥礪期以漸磨而圖之其他城隍之修學宮之葺鄉賢名宦之崇祀道路水患之辟除戶口差役之均平厥旣得奉檄而次第舉行之矣獨縣之題名久無俾前之政無以垂昭勸後之人罔知所法戒誠爲缺典因伐石盤陰構匠而鐫之已往漫無所稽爰自國初之建置以迄今日若尹若丞若幕皆得而書之間有失其籍址忘其資格者闕如也嗚呼今之視昔猶後之視今也是刻也政

事之美惡人品之高下心術之邪正與夫民之好惡因而可考矣邑之人日觀歲覽按今憶昔於茲而較量指數之不將爲一方春秋乎凡我官僚登於斯者皆當猛省賢者師師否者恐恐秉心如石之堅立身如石之直勿負國家之作養毋忝前修之型範以保惠慈祥爲念以清白循良自期毋以偏小爲不足治毋以窮衝而怠其心殫厥忠智凡力之所能爲心之所當盡者自勉焉庶於石丈人無愧矣故序之以爲後之君子告

增修府君廟記

邑人李梅庠生

廟君廟在平谷縣東北七里許肇建於隋唐間歷千餘年
靈異孔赫遠邇居民兵革疾疫水旱災祥祈無不應廟制
舊有正殿三楹東西列二祠嘉靖二十六年住持毛太澤
以規制淺狹殿宇卑陋未足以稱府君功德之隆將廓而
大之迺謀諸耆欲以正殿改爲寢宮而前復立正殿衆是
其議迺共竭誠募緣得錢若干緡米若干石僦匠傭工累
石築土爲高臺幾二丈遂建正殿三楹於上復立馬殿於

廟門之側又見寢宮洎東西二祠頗有圯壞亦加修葺視其堅全者仍之朽缺者易之然其費甚廉爲力甚艱也故經始于嘉靖二十六年之秋落成于嘉靖三十五年之春力以漸集工以次舉幾十年始就由是廟之規制中崇外敞廻複幽深金碧輝煌度越舊址萬萬矣績旣成鄉人建碑乞余言以識其歲月余以鬼神在天地間茫昧不可測識所謂天道遠人道邇而將興之國有不專聽於神崇信而稱述之若惑矣然以理論之則名山大川之靈與夫忠

臣烈士死而不朽者其精氣英爽陟降宇內常耿耿不磨
皆足以羽翊元化宣布天威往往蹟應顯著是又不可以
左道淫祠眩惑民俗者槩棄之也今府君之神其詳雖不
可考然據其封爵號稱于歷代則其勳庸之著於伊始者
諒必有功於社稷有德於生民而不可誣且其降祥於今
日又能禦大災捍大患福善禍淫報應無爽爲一方所恃
賴徵諸祭法用崇祀典理固宜矣然非人心之誠敬不足
以感神之威靈非神蹟之赫奕不足以致人之崇奉自太

澤等聿新廟貌則其昭事之誠眞足以慰神心於罔恫而
府君之威靈顯示一方者將有致愛則益存致愨則益著
矣由是以保定國祚福佑生靈綏吾民於康壽之域以陰
助乎國家清寧之化端有望於府君焉而亦孰非修廟格
神之功也然則是舉也所謂明無人非幽無鬼責豈徒曰
役志於茫昧以幸福免禍者比哉是用備書於石仍刻詩
一章以傳示罔極詩曰大神有赫靈輝煌奉天威令奠厥
疆神宮巍然逼元蒼彤楹文戶紫檀房府君之來天中央

袞水龍衣雲錦裳村翁歲時修典常享祀靡忒神洋洋鯨
鯢戮死魍魎藏保茲鄉井若雨暘天清地寧民樂康誰其
尸之神降祥嗟爾黎庶德是強善使錫慶慝被殃我作是
詩非渺茫金石永刻繹莫忘

平谷縣新建社倉社學記

宣城湯賓尹 編修

史湯子曰自余通籍于今未一年所所概於時事未嘗不
盱衡也天下數儉於歲里無蓋藏鬻鬻之家不飽蒲芋枕
相藉于道烽燧告警所在騷然倭形明不可知環海之民

有莫必其命者矣頃又益以乾清坤寧之災公私累代之積一夕若埽內外徬徨苦作相尋民興心矣素不習于誦而生是急彼有鋌而走險安可誰何蓋天下之平久矣物極則變理勢使然平谷外極邊僻內隸郊圻最爲巖邑其謠俗沉鷲椎鈍猶有幽薊之風今尙何可謂無恒產有恒心而凡民之興不待教也倉儲學校之設何邑蔑有撤儲困以饋羸則吾能何以居夫羸外之用乎哉則此虛中之計也博士弟子員之所上猶畫髮耳以幼所不調之子徒

竊文墨侈衣冠藏盜魁其中卽加饑饉生死橫迫怙其氣
習而爲嘯以逞維今日又易搖也肉食者能無墨焉以
余所聳於吳君可謂急時者矣君爲平谷則首捐緡置社
倉卽又置社學而各爲脩以靳不廢者五其爲倉也樹穀
平估以時出內以備水旱不時之災使邑無滯積亦無困
人而其爲學也羣邑之子弟童而誨之使之習于揖遜進
止預以肅其疆氣而折其邪萌行之數十年民庶幾無衣
食饑寒之剝而禮義是常卽有暴子弟勁勇囂杰之氣可

勉而爲縣官用也又况乎忠義之性植乎其天者哉吳君
之政務在爲民識時務茲其概也夫使吏于今者而皆有
意乎民何憂天下哉百姓匆匆誰父母之一旦有急未可
恃也已余爲書吳君治行并職時事君名之美常之武進
人

楸巷記

邑人馬維騏

平川先生
弘治貢元

平川書院樓門之北禮門之南列種十有四株其二株不
茂旋移恭敬門內不成行者更之各長丈餘圍三寸許楸

梓屬也梓有實可種其成也易楸無實取諸穴其根旁引以魯生其成也難是木也才高而理直質堅而韻清亦可謂美材矣當盛夏之際疎柯密葉如幢如蓋烈日不入炎蒸不作宛然一清境也書院主人時時衣冠坐其中橫琴而鼓焉弟子之解音律者亦屬而和之七弦之音洋洋乎盈耳哉血脉鼓盪神氣清和恍然虞舜之在帝位也一日鼓琴希主人顧謂弟子曰琴之音亦有所助乎弟子曰不知也主人曰楸巷助之也人徒知巷之清而不知巷之有

助琴音斯卷也上密下實而中空焉故琴之音洵洵焉淪
淪焉清濁高下而各中其節不啻在重樓虛室之中茲非
其所助矣乎弟子曰小子何足以知之言畢主人充然有
得仰天而歌曰風飄飄兮雲悠悠我心樂兮造物同遊幸
皇王御世兮復何求

元寶觀活死栢之記

見前仙釋長
春真人

玉溪老人趙 鑄

竊以理之在天下未有不以耳目所接爲有而所不接爲
無此事之必然勢之必至也昔東漢任處士叱未朽黃水

邊已枯之楊而李唐呂仙人藥僅落萌城南久斃之樹雖
聞其語未見其人而信之心未篤歲次丁亥長春真人上
遣使勅駐馭於長春宮燕京東諸帥北面執弟子禮請醮
于田盤山之棲雲觀雖旦夕稽首竟不賜諾託余以詩起
之隊仗過平谷飯于城東獨樂村玄寶觀中有一栢枯瘁
歲久了無生態師起而摩之輒嘆可惜者自明年春其柯
葉復生鬱茂如故見者奇之余方客東臬與是村相望一
舍耳熟其事以傳聞日久一日以事去京假道于路託宿

于州之通玄觀解衣盤礴日云暮矣方欲就枕有道人李
治平者執松明攜短幅啟戶而入以幅授余發而讀之迺
南塘老人譽長春子活死栢之詩疇昔所疑如□□霜釋
然消去眞所謂非異人不能成異事非異士不能表異跡
李從容謂余曰欲碑其事以永其傳渠爲我文之余于二
老俱有半面雅其義有不可辭者索筆以書其事

清

重修平谷縣儒學記

乾隆二十七年

邑令張蘭芳

崇建學校非徒以報祀先聖亦以廣厲賢良也故采芹泮水而知魯道所以盛青衿城闕而知鄭俗所以衰人材之消長風教之隆污雖曰天運豈非人事哉平谷之儒學肇於元至元間明成化五年邑令郭君銘修之嘉靖二年監察御史熊公榮修之至四十年邑令任君彬更大修之鼓舞勸興雖數君子力爲多諒邑中士民亦皆知崇教重道故踴躍勦事不日而成計其時數百年間文教昌明鳳翽鴻儀之彥接迹而升誌不絕書誠有自來也蓋學聖者必

以聖域爲根本之地猶人之法祖者必先於祖廟樹不拔之基理固然矣奈何是邑民風士習久而漸弛典禮之場遂任其彫殘剝落李觀所刺朝雨流潦夕天羅宿不能不見於茲也蘭丁丑簡任是邦卜日釋奠於廟見其堂廡敗壞門墻傾圮惻然心傷聞是未理者已百年卽間有補苴而因陋就簡者多矣嗚呼士人朝夕所奉爲依歸者何顧於根本之地且缺焉弗理尙安冀其發名成業哉宜清興以來菁華之士所爲消歇也緣是亟與學官李君長人喬

君藍并邑中耆士共謀鳩工而更新之官捐其俸民助其
貲取材於山發石於壟凡大成殿東西廡名宦祠鄉賢祠
戟門櫺星門及後之啟聖公祠明倫堂悉皆整繕完備黝
堊以增其飾墻垣以重其周雖規模仍舊而氣象一新經
始於己卯之春落成於壬午之秋蘭蓋時加省試焉竊謂
聖道如天其神橫塞海宇周流六虛茫乎無涯際浩乎貫
古今本不恃形而立滯迹而存又奚待安土而固亦豈峻
宇高墻所得而圍哉然以爲不如是世之人反以聖人之

神爲不可憑也不可憑則或疑而或畏之矣昔端木氏有言曰賢人之道日高不高則不尊聖人之道日卑不卑則不親歷朝之制內有太學外有郡學皆特崇其地以爲眞有一聖人在其中若魯恭升堂聞響故事使賢知者望而知歸愚魯者亦仰而不越此則古今立學之深意乎蘭之爲是役也非徒粉飾太平已也實期是役之人上尊聖教下敦實行文章事業以繼先朝則後之視今將大異於今之視昔矣予是敬爲之記

重修平谷縣城池記

乾隆三十八年十二月

中州朱克閱邑令

粵自黃帝始營國邑後之保障斯民者因之作邑土中倅
來獻焉築城伊馮大雅詠焉城向浚洙春秋特書焉命有
司坏城郭戒門閭修鍵閉固封疆月令有紀焉故龍見而
戒日火見而致用水昏正而裁日至而畢莫不因天之時
乘地之利用人之力以爲禦暴保民之所惟茲平邑星分
箕尾郡號盤陰北列瑞屏南繞洵水爲神京三輔要地誠
天漢之津梁幽燕之關隘也我皇上巡幸盤山省方問俗

蠲租免賦賞賚耆民咸被鴻恩於罔極而漁陽重鎮殘缺
頽敝其何以壯觀瞻而衛民社乎夫邑治肇於永樂修於
成化完於嘉靖文正公商輅邑御史王鏜曾爲之記至我
國朝屹然如故百年以來漸近傾圮邑令鄧君來祚詳請
重修未幾卸事大憲命北路廳李公化楠爲之經始我憲
臺張公在相繼董率竭力殫心功難悉述至謝公洪恩聿
觀厥成而工告竣總爲計之卜吉於丁亥鳩工於庚寅報
最於辛卯約費帑金四萬四千二百有奇而城若金湯池

若天塹四門望樓如跂如矢煥然維新也洵可鞏固於億
萬斯年矣余世家嵩伊丙戌榜前揀發江蘇署清軍總捕
篆務改撥直隸歷署灤州隆平於壬辰夏題署茲邑下車
聿始見夫高壘巍巍與妙峯同其翠嶽陂池淵浩與靈泉
共其湛深僉以爲設險守國可爲斯民保障也豈知其土
敦詩書農安耕鑿民性之醇樸民風之敦龐無形之險隱
寓於有形中哉爰於課士勸農之暇稽其始末珥筆而爲
之記銘曰卓爾平邑地近畿輔巖岨崑嶺去天尺五山擬

嵩少水似洛浦境接塞北城高中土皇仁浩蕩德洋恩普
萬壽無疆永奠千古

重建魁星樓叙贊

中州朱克閱

斗魁戴筐六星曰文昌官一上將二次將三貴相四司命
五司中六司祿周禮以樛燎祀之我平邑建其祠於學宮
由來遠矣至於斗魁光連四輔輝映三台燦宇宙之英華
開古今之文治與文昌相等埒世多繪其像以崇祀焉明
永樂初建樓于東南隅故自丙辰越己未甲科一十六人

自戊子迄己卯乙榜五十六人武魁五人鄉會聯芳名宦
輩出二百年間史書不絕也啓禎而後樓臺傾圮桂籙莫
紀已百有餘年矣天運數週人文未啓將地之不靈與人
之未傑與抑魁樓之未建士志不思奮與我盛朝菁莪造
士棫樸興賢薪爇芄芄著天章於雲漢吉士藹藹蔚人文
爲國華而盤陰一區獨無人焉榮膺鸚薦不負皇上壽考
作人之至意宰是邑者能無愧乎前令來祚鄧公緣城垣
之初建議魁樓之肇修與儒學王君爾烈字瑤峰副學賈

君蒲會集諸生暨闔邑紳士王子樹勳周子開邠徐子植
王子雲鶴等重立是樓以興文教諸子樂出己資更相勸
募或分其任或總其成典史曹君延齡日爲董率時加勸
勉辛卯之歲瑤峰名題雁塔欽點詞林而功適告竣行見
高閣凌空岑樓橫翠筆掃雲霧千百年之文運重開斗量
珠璣億萬載之光華復旦矣余以壬申鄉貢接任漁陽製
燈上元與教諭賈君鳳吟訓導田翁之錫暨武弁陳君廷
良集同學弟子員張兆鳳徐伯常賈名伸王家客等於樓

下講理學源流論經史精蘊及鄉會文體應科律詩諸生
咸爭自奮勵日勤課誦思繩祖武而繼前修數年之內必
有偉人策名天府備員闕廷前日之盛不將見於今茲哉
余深嘉之爰勒石而爲之叙贊曰魁樓數仞峻極於天杓
攜龍角榜登虎前衡臨紫極斗掛城邊瑞氣朝映神光夕
懸闢茲石室澄我靈泉洵躍金鯉屏生玉蟾文星丕照甲
乙科聯勗爾多士有開必先

重修平谷縣倉廩記

乾隆四十一年十二月

中州朱克閱

古者耕三餘一耕九餘三以三十年之通制國用量入爲
出所以有備而無患自漢耿壽昌奏設常平倉唐戴胄繼
長孫平立義倉朱子在建寧崇安則有社倉我盛朝嘉惠
元元兼備焉此平邑倉廩所由建也倉在官署東壁康熙
三十年邑令余學昌建修常平倉增字北廩七間興字西
廩五間盛字東廩七間其滿字南廩三間半邑令項景倩
於雍正十二年建修至乾隆十三年邑令栗培初添建滿
字東廩三間裕字廩十二間迄今數十餘載風雨薄蝕棟

宇傾圮所貯之穀難免霉黴之虞余三十七年來宰是邑見其墻垣頹敗木料剝朽諸厰滲漏盛字厰七間俱已坍塌四十一年春詳請動項修補六月鳩工九月告竣共領用銀九百六十八兩有奇由是增興盛滿諸厰咸宏廠壯麗貯穀萬石以陳易新自永裕而無匱矣且夫積貯者生民之大命也貴則減價以糴賤則增價以糴寔心行之民享其利而常平於以常豐或借籽種或借口糧加息免息擇里社殷實醇謹者董其事民沾實惠而義倉社倉悉得

人而無弊爲宰者清白乃心平準斗斛復嚴禁胥吏不得
侵漁以仰副我皇上體卹民隱之至意疇謂有治法無治
人哉是爲記

滑子莊三皇藥祖廟記

乾隆年間

邑人王

澄庠生

平邑震區有盤谷一山峰巒聳翠巍然畿左之大觀也盤
迤北距一舍地林木幽藏丘阿路轉爲滑子村也村之外
有桃源問津之勝有環水紋波之致有曲折蜿蜒孤峰突
峙之奇望則峭壁子出氣勢凌霄若無竚足地陟則巔平

坦易曠達磅礴實有可立之基一日者村有善士庠生倪子秀起輩登步其上盤桓久之相顧而言曰吾儕居此勝地曷不有建於斯以崇一祀乎衆曰唯唯起漫議曰使吾儕功成不可爲幻相淫祠者祀必正其祀於有功濟衆澤民利物之先聖也而後可衆曰唯唯旣而思澤民如三皇也濟衆如藥祖也利物如苗神諸聖也自不同於幻相淫祠比比之不足祀也明矣於是再稽祀典曰功施於民則祀之救災恤患則祀之勳勞社稷則祀之愈知三皇藥祖

苗神諸聖之宜祀也倪子遂奮臂一倡應如桐魚之擊石
鼓衆善協從遐邇翕助庀工敦匠扛材運石雖家人婦子
各殫其誠建中之殿爲三以三皇藥祖苗神諸聖祀左爲
僧舍二間右爲倉儲二間繚以垣墻蔽以山門草創落成
礮石問記予也勅期媿無以辭謹以此爲樂善誌

重修平谷縣學宮記

光緒十六年七月望日

保陽徐壽朋

候選道員

平谷縣文廟自乾隆二十七年重修至今已百有二十年
殿廡傾頽墻垣欹仄蓋失修久矣邑尊鍾公德輔蒞官斯

士慨然以振興文教爲己任書院考課優加獎勵所以嘉惠士林者無微不至是邑不發科第已數十年前歲戊子王生以謙登賢書在庠諸生爭相摩厲其明效可見矣去冬鍾公勸諭各紳集資修理文廟捐廉爲倡各鄉皆踴躍樂輸於是偕正學張君銜副學馬君成章共謀經始擇紳士董理其事鳩工庀材擇日興作修建經費悉歸董事經理官不與聞自大成殿東西廡文昌宮崇聖名宦鄉賢忠義諸祠及戟門櫺星門俱拆卸重修凡棟梁榱桷之朽者

蠹者裂者皆擇良材易之磚石之破碎者剔除弗用明倫
堂傾壞無存重爲築基建立又增建文昌三代祠城東南
隅舊有魁星樓亦葺而新之高之是役也計用銀二千數
百金自二月十七日興工至七月望工竣不數月間烏革
輦飛奩輪並美仰瞻廟貌煥然改觀可謂速矣平谷居京
師東北爲洵水發源之地又有盤峯聳秀高峙於側其磅
礴鬱積之氣蓄而必發得賢邑宰雅化甄陶行將爲人文
淵藪卽今邑中人士見學宮重修亦必鼓舞奮興益動其

尊崇先聖之心而愈勵其遠紹前修之志矣豈不盛哉承
監修諸君之屬爲記其大概如此

創建平谷縣高等小學堂記

光緒三十年孟秋

關中張繼信邑令

平谷爲京北之奧區民風樸魯士習樸厚舊有近光書院
爲邑人講習切磨之所自庚子變亂以來庭宇頽傾前後
院落亦多圯缺不完蓋兵燹餘生久已無力修葺矣夫三
代之學不外砥節礪行今則萬國交通非窮天地古今事
務之變綜中外政治藝術之全不足以宏濟艱難而挽回

夫世運癸卯冬予奉檄來權斯邑下車伊始卽以興學堂
爲首務幸各紳富踴躍輸捐共集成款二千八百餘金于
是鳩工庀材就原日固有之書院葺而新之自藏書樓而
講堂而左右兩舍榱桷欹倚者更之瓴甓剝落者易之復
於講堂後西隅隙地拓之補之垣之屋之悉遵欽定小學
堂規制次第而經營之工旣竣乃考取合格學生稟派教
員擇日開學課士以本地之財力培養本地之子弟尤願
文行交修講求實用一洗從前空疏孤陋之耻是則鄙人

所深望者耳是役也倡捐修造始終身總其事者徐紳越也司納出入督察工匠則王生泰元王生銘王生坤王生鈴安生學海亦與有力焉茲當工竣落成爰撮大要而爲之記

民國

革除差徭布告文

民國五年二月

紹興沈

銓

邑令

照得新猷裕國子愛爲先舊政勞民差徭爲最值茲時艱孔亟新稅厲行兵氣未消南滇之烽烟告警軍需尤亟東

人之杼柚一空本知事蒞任以來聚七十二鄉之父老博
訪民隱僉謂差徭舊制至今未去閭閻疾苦惟此爲先一
聽承催有檄早驚婦孺之魂漫云供億無多已剗窮黎之
肉加以取一徵十寬富急貧官廳之收入有限民間之耗
費不貲任吏胥夤夜之呼擾及黔婁布被貽邑里無窮之
累寧獨安石青苗本知事籌思至再祇以此項陋規業已
列入預算化私爲公抵補無策因循至今茲於兼籌並顧
之中爲挹彼注茲之舉特行陳明 大憲請將秫稽號草

二項差徭自五年二月起一律革除由本公署於公費樽
節項下彌補抵解以寬民累荷蒙 大憲俯鑒愚誠批准
立案自此追呼之擾不聞藁結之徵悉免俸捐琴鶴聊盡
我心例革蠶羊永除厥弊時乎太晚惜藐躬才短撫綏汽
可小休願百姓同安耕鑿特此佈告俾衆週知

修築平谷縣城垣記

民國九年十一月

邑人王兆元區董

自黃帝始立城邑以禦暴保民民得以安故城彼東方詠
於風詩使坏城郭紀於月令設城既爲備患之大防則修

築尤爲急務此春秋所以有城必書有築必書也平邑峯巒屏蔽河流潑洄形勢雄偉畿東奧區而磚石爲城以資守禦惟東北隅圯齧五丈餘歷二十餘載當清光緒庚子之戰爭民國初年盜匪之猖獗城中商民咸以是處爲憂荷槍持矛晝夜防守陴內幸免蹂躪然亦危矣若使再經數年雨水冲流必成芻牧之捷徑馴致防不勝防值此萑苻伏發靡常之際城垣有失必至市廛焦土居室成墟秩序紛亂全境騷然所關豈不重且鉅哉民國九年夏月邑

長王公蒞任伊始巡閱城垣目擊其處積阨弗足以禦颯
舉烏集之寇爰議興葺民樂輸貲遂委紳董監修啟工於
是秋八月畚鍤雲集登登馮馮閱月餘而訖事巍然堅竣
一如其初事竣囑予爲記予惟是役也雖商民捐貲出工
踴躍翁助董築諸君實心經理克殫勤勞尤賴公之毅力
倡建以觀厥成蓋城爲一邑之重地官署之圖籍文卷存
於斯倉厩囹圄在於斯國欸之收入闔閭之貨幣莫不儲
蓄於斯卽一朝有警村莊之居民車馬亦莫不依託於斯

今既修葺鞏固則衛內翰外之功偉矣由是重門擊柝有備無患市民晏然利在久遠胥公之設險防微有以致之也公名沛甫翊漢浙江杭郡人以簡任職權篆茲邑云

詩類

夫文以載道而詩則言之成文發于咏歌者也達人君子至止斯地者恒有著作或因事示戒存之足以彰微或懷古屬律考之足以資博亦志之所必載者故志詩

復生栢

張文度

號南塘老人

山村老宿鬚眉白根撥和雲移小栢慙懃擁護數十年直
幹亭亭高百尺歲寒曾不變真心庭雪到腰纔自適明堂
大廈構良材正恐工師來選擇奈何亂世生不辰翻有饑
民斧斤厄半身寂寞被賤殘顏色枝條頓狼籍竭來枯稿
逮三年不忍風摧并日炙鬼薪蚊炷世所珍憂見斬伐無
旦夕長春仙子偶經過兩手摩挲言可惜明年太歲在元
枵秀葉參差如舊碧異事未免衆人疑不信道人能起甍
居不見田家荆樹中道枯孝友一感復還甦又不見萊公

折竹表忠義插地乃活元非誣况乎得道不可測招乎元
氣薰朽株坐令此栢成鬱茂遭遇還勝愚夫愚長春今已
歸蓬壺栢爾善保千金軀

山谷道中

山陰蕭鳳鳴

巡閱御史

百折崇崗轉未休征輶終日繞溪流黃梨紅棗垂垂熟別
是山城一段秋

盤陰積雪

關中劉

愛

平谷縣尹

半山殘雪永難消三月桃花尙未嬌每到清宵閑眺望月

明玉壘倚雲霄

洵水晚渡

洵水清漣魚泳時
牛羊向夕更歸遲
溪頭爭渡誰家子
深淺從來要自知

峨嵋聳翠

巉巖秀麗翠如流
高入雲間碧玉浮
遊客騷人時玩賞
只疑瑟瑟在山頭

石室清風

鑿開混沌紫雲瑛兩腋涼生爽氣清流火不煩紈扇動瑤
臺月殿敢相并

獨樂晴波

獨樂嘉名自古傳况逢紅日正中天澄波渺渺清還靜網
罟不驚鷗鷺眠

鼓頂朝雲

石竇誰知有蟄龍朝來嘯氣映山容遐陬每有雲霓望不

比巫山十二峯

靈泉漱玉

野寺雲根驟起瀾
龍宮噴出碧琅玕
清涼速得天潢唇
齒忽生六月寒

峯臺夕照

高臺突兀倚晴空
遠近霞連草舍紅
返照平林鋪錦繡
行人常在畫圖中

題八景一律

曲陽李柱明

平谷司訓

盤陰冰雪四時堅
洵水迴舟擁暮煙
石室風清分皓月
峨眉

崑山翠插青天晴波獨樂金銀眩鼓嶺同雲雨露鮮更羨
峰臺宜返照靈泉漱玉滿前川

自平谷移署青篆

李傑選 御選試用

自慚糜祿令畿東夕惕朝乾凜至公聖澤如天淪骨髓臣
心無地報帡幪一官已見髭鬚白雙印還驚汗頰紅馬上
幾番回首處依依皓叟與黃童

盤陰積雪

長白樂克山 靜巖

皎潔盤陰雪春深尙未消三冬積曙久六出結花牢白日

光難到紅塵勢已遙窮年茅宇下相對步青霄

洵水晚渡

洵水傍京國頻經晚渡來日移崩岸迴沙動片帆開歸鳥
飛還止征人往復迴况當村落近我馬未虺隤

峨嵋聳翠

是山多翠色此嶺獨超羣碧草留春雨青松冠夏雲難容
張敞畫應許漢宮聞傳道峨嵋月清光早共分

石室清風

一龕鑿太古日挹萬山風獨立囂塵外誰留秘字中樵音
來杳靄天籟動高空羨殺歸栖鳥冷然御不窮

獨樂晴波

山城傳獨樂清絕野航稀一水陶然瀉羣鷗知所歸高涵
雲影淨遠映曙烟微共泛晴波上長吟送落暉

鼓頂朝雲

翠嶺形如鼓朝雲頂上封光生旭日影勢變寒山容高隱
冲霄鶴低依偃蓋松不勞楚子夢久矣薄巫峰

靈泉漱玉

靈泉噴碎玉一曲傍山家處處供遊客年年送落花清音
雲外和哀響澗中譁到海須時日安流且莫誇

峰臺夕照

落日峰臺上登臨暮景收牛羊歸遠陌烟靄滿空洲岫隱
餘光在林深亂彩留驀瞻東嶺月一嘯萬山秋

盤陰積雪

邑人馬一驥

東邨

誰卸玉龍甲盤陰凝結牢光生八石暎色照五峰高積冷

林猿避深寒穴虎逃會當舒眼望背嶺絕塵囂

洵水晚渡

洵水流今古扁舟晚渡開鳥冲烟靄滅人帶夕陽來車馬
通幽薊樵耕跨草萊片帆新月上森森隔征埃

峨嵋聳翠

共道三峨峻此峰直與羣勢懸千里月高入九霄雲雨洗
嵐光潔霞明黛色分蠶叢標勝迹垂老恨空聞

石室清風

清風生石室天籟响鴻濛草嫩搖新綠桃飛掃落紅眠雲
穿窈窕延月入虛空我欲盈襟袖陶然憇此中

獨樂晴波

天光水色合風動練花飛窟靜蛟龍睡機忘鷗鷺肥翠灣
浮荇葉香渚卸蓮衣獨樂晴波晚漁舟載月歸

鼓頂朝雲

鼓頂憑誰闢朝雲幾段濃雷門空作想巫女若爲容有色
迷殘夢無聲伴早鐘欲將桐木擊催去直從龍

靈泉漱玉

泉靈通萬派玉漱潤千家勢亞瞿塘瀉高翻雪浪花灌杻
遺厚利浸草注深窪終作朝宗想蓬瀛路未賒

峰臺夕照

峰臺凝暮靄烟鳥向林投夕照留荒野歸雲帶戍樓蟾孤
燕塞遠霞散太空收古寺鐘聲急乘風度隴頭

盤谷寺

卽青溝

仁皇雕輦駐青溝老衲袈裟叩冕旒澗草生歡迎豹尾巖

花含笑簇龍旂只今木石猶矜寵在昔松雲更邁儔歲月
無多成往事一聲清磬出山樓

春日馬家莊見始祖漢大將軍墓有感

水遶山圍列古墳秦時名郡漢時村難同絳帳聯宗譜敢

向雲臺系遠孫學士笙歌標汗簡故侯弓劍沒荒原先始祖成漢封

全椒侯烟花過眼催頭白懶對青青墓草痕

盤山吟

梁永建 德傳

畿東屏蔽天下奇羣龍磅礴紛透迤太行碣石相繆縟幽

并連跨雄□□五丁開鑿何年斧神鏤鬼輸驚削劇中膚
外骨萬蓮鏢螿攢瓣襲青纍纍葦蕤歷盡飛花片蘊秀苞
靈千百變祥烟兔彩曜陽暉俯瞰滄溟纔一線鴟鵬投翅
雲飄揚陣馬騰驤峰隱現盤旋磽确欵徑行躋身層疊開
生面七十名庵半劫灰我來躡屩蒙蒿萊松杉蒼鬱譚禪
石枳棘荒涼舞劍臺銀河瀉頂觸星斗靈湫駭魄驅風雷
蟾蜍夜半入丹井琳宮深鎖封莓苔珠林瑤草蟠清閼巖
罅金鐘流梵唄方廣精藍說洞天煉真學道多茫昧神仙

省冥難詰窮大抵達人具遊戲苟能羽化得神通誰不黃金輕脫屣

哭薊門亡女

邑人王漁璜尺玉

女死人倫自不慙肝心裂碎我何堪肯將節義還天地願女來生化作男

輓耿烈女

邑人王憑學生

弱女盈盈甫十三捐生慷慨勝奇男古今苟活知多少對此難消五內慙

秦州臨難詩

邑人王 札

無端反側效螳螂漫自當車攘臂強憤蓄寸心推祖逃悵
懷綿力愧馮唐徒思指日回天短妄想乘風破浪長不爲
時窮憂在面惟羞國耻負君王

其二

壯心如許促行程愛割牽衣妻子情纔別涇泉歌易水思
來隴右斬洪鯨功成願借舌鋒利事濟何須寶劍鳴只有
一身酬聖主那緣竹簡望題名

其三

滿懷忠憤到秦州
宛入無人境內遊
來至中軍陳教化
先觀兒稚列戈矛
詞嚴正論君恩重
色赧難禁反側羞
寧使一身甘鼎鑊
不教萬里繫宸憂

其四

丈夫有淚不輕彈
說到文山心亦酸
慷慨定須留正氣
從容莫愧戴儒冠
披肝瀝膽成仁易
跋扈強梁飲恨難
目下自知身首異
千年魂怨卦臺寒

讀平谷縣志詩

邑人賈名伸

西南百里向神州獨冠畿東景最幽欲識桃源何處是四圍山色一溪流

山似游龍夭矯形彎環一帶聳遙青倚天獨占東南勝看取盤峰列畫屏

註山在縣東南三十里邑名盤陰取此案盤山之陽爲薊州陰則平谷

廢置千年溯漢唐金元輿地具參詳環山紀實名難易賸有孤邨號大王

註

志載縣名平谷自漢始唐改爲大王鎮金復爲平谷縣元以後因之又載大王務在縣南十里

營寨紛紛號紀邨勝朝曾此設中屯近畿百里耕桑地當

日邊防作北門

註

志載營州中屯衛在縣東明史謂永樂元年自故龍山縣移置於此案中屯衛今邨落尙多有辛寨熊耳營等名

忽訝茫茫世界浮雙崖夾處一泉流此間便已成雲海况
乃盤峰最上頭

註

志稱暗峪在盤山西十里每春雲起頃刻覆山谷若大海茫無涯際因名龍泉

此亦人間一峴山雙峯指點翠微間遐思羊杜風流在便

作襄陽勝迹攀

註 案峴山在縣南十里

絕嶂橫遮曲逕幽三泉古寺記曾遊憑誰好爲勤疏導雞

足山前一淺流

註 志載雞足山在縣東三十五里下有三泉寺

慨想金源首重廻傳流遺蹟半疑猜近郊遊獵當年事猶

有邨名望馬臺

註 志載縣南五里有看花臺東二十里有望馬臺摩鼓臺北二十里有發箭臺相傳皆金章宗遺蹟

遊獵應知歲幾回
看花之外又三臺
區區僻境猶如此
況乃山川四望開

註 同上

弓劍橋山卽此無子昂詩句
或非誣當年祇謁瞻遺像
想見龍髯墮鼎湖

註

志載軒轅陵在縣北十五里漁子山下今上有軒轅廟案廟前碑記引陳子昂詩云北登薊邱望求古軒轅臺

雲臺良將勇深沉
家世南陽故宅尋
就國全椒終老後
何

因踪跡到盤陰

註

志載漢將馬成墓在縣東二里馬各莊有碑云漢全椒侯馬成之墓

一戰當年偉烈彰漁陽勝蹟比昆陽漢家十二將軍在掃

盡尤來又大槍

註

後漢書光武遣吳漢等追擊尤來大槍五幡及平谷大破滅之

水利經營訴昔賢開渠西北定何先畿東疏鑿成尤易小

試靈泉數頃田

註

考明史稿徐貞明爲墾田使興西北水利先治畿東州邑如平谷水峪寺龍家務墾田若干畝

斷岸誰安略約橫半容流水半人行中間有漏根因在聽

取珠噴萬斛聲

註

案水峪寺有漏水橋橋環植楊柳綠陰滿地真洧夏灣也余爲之語曰平橋飛瀑

湫灩連邨望眼賒香風披拂到山家遊人似覽西湖勝十

里波光十里花

註

高邨稻地二莊並有藕塘在盤山以西數里余亡友張桐崗兆鳳嘗爲之語曰十里荷香

似小西湖一鑑開蓮塘咫尺意悠哉鄰邨偶趁微風便時
有清香吹送來

註

案蓮花潭在余家放光莊西里許亦有藕塘

泐水洵水大小殊試方獨樂有殊乎僂奚博陸源流在忍

令偏遺滄海珠

註

水經注泐水出北山山在僂奚縣故城東南東南流經博陸故城北逕平谷縣故城西東南流注於洵河案故城在西北十三里城子莊今水道與水經注不異

鼓頂城山未一遊遺文還向水經求絜城故址今茫昧更

有誰知五百溝

註

水經注洵水自平谷縣故城東南南逕絜城東而南合五百溝水水出七山東逕平谷之絜城東南入於洵河

戡亂元須應變才揭竿蜂起向城隈神君破竹能迎刃良

莠區分一跪來

註

志載邑侯牟公雲龍平土寇事大略聞故老言土寇起時公聞變亟部署兵衆出城寇已至城西將薄城公遣人大聲傳呼諭賊衆曰脅從者跪衆紛紛跪遂得其渠魁斬之土寇平民立廟祀公今東門上坡有牟公祠

歎息貞珉何處求蟠根仙李舊風流我疑漢水濱堪問可

有碑曾向此投

註

案邑侯李公傑選有去思碑紀善政數條皆實事會遵新例卽碑今不知其碑文尙可考否

夙契廬江政蹟彰口碑隨處足推詳峰臺八十年來事尙

有家家一瓣香

註

案邑侯何公輝寧在任時有旗人某倚勢奪峯臺莊民人田訟甚健公察其情卒以田歸民人民人感甚舉莊皆爲位祀公于家

每念殷勤勸課情古心如復對先生邑庠夜火晨雞外聽

取人家紡織聲

註

案邑侯朱公克閱余所從小試及課文師也性謹厚喜談文諄諄勸人攻制舉業士風漸變又作機杼之具以教人由是邑人習於織

